



AWIG – AWIG
DESA ADAT DALEM SETRA BATUNUNGGUL
KECAMATAN NUSA PENIDA
KABUPATEN KLUNGKUNG



Kasurat Oleh :

KRAMA DESA ADAT DALEM SETRA BATUNUNGGUL
TAHUN 1987

MURDA CITA

“Om, Swastyastu,”

Mimitan saking asung kerta waranugraha Ida Sang Hyang Widhi Wasa, sane rumaksa jiwa prama Tribuawana miwah sedagingnya. Mejalaran manah dresta bhakti, adung wirasa, gilik seguluk, kalihlarapan çanta jagathita sinaggah murdaning prayojana pangriptaning awig-awig.

Awig-awig wantah pamikjuh tata sukertaning Desa Adat ngemanggehang kasukerta krama desa rauhing kulewarga pamongania sekala lan niskala. Sajeroning minabdabin sukertaning desa krama, patitisnya nginggilang tata prawertining megama saha ngrajegang Sanghyang Agama manut dresta.

Sajeba dresta inucap, pemekas Pancasila lan Undang-undang Dasar 1945, miwah sehanan tata titi inggih punika Peraturan-peraturan Pemerintah Negara Republik Indonesia tan maren manggeh kainggilang antuk Awig – Awig puniki.

Mewastu prasida molih manut pengaptinnya.

“Om, Çanti Çanti Çanti, Om”

DAGING BUKU AWIG – AWIG DESA ADAT DALEM SETRA BATUNUNGGUL, NUSA PENIDA
DAGINGNYANE

Nomor	Dagingnyane	Halaman
1.	Murda Cita	ii
2.	Daging Buku Awig-awig Desa Adat Dalem Setra Batununggul	iii
3.	Sarga I Aran lan Palemahan	1
4.	Sarga II Patitis lan Pamikukuh	2
5.	Sarga III Indik Sukerta Tata Krama	2
	Palet 1. Indik Krama lan Warga Desa	2
	Palet 2. Indik Prajuru	4
	Palet 3. Indik Paruman	6
	Palet 4. Indik Kulkul	8
	Palet 5. Indik Druwen Desa	9
	Palet 6. Sukerta Pamitegep	10
	Kaping 1. Karang Tegal	10
	Kaping 2. Pepayonan	10
	Kaping 3. Wewangunan	11
	Kaping 4. Indik Wewalungan	11
	Kaping 5. Indik Reresik miwah Kebersihan Wewidangan	12
	Kaping 6. Indik Sekehe Truna Truni, Sekolah lan Penghijauan	12
	Kaping 7. Indik Baya lan Dusta	13
	Kaping 8. Pangunyanan Banjar	14
6.	Sarga IV Sukerta Tata Cara Agama	14
	Palet 1. Pura – Pura sane wenten ring Desa Adat Dalem Setra Batununggul	14
	Palet 2. Indik Resi Yadnya	17
	Palet 3. Indik Pitra Yadnya	17
	Palet 4. Indik Manusa Yadnya	20
	Palet 5. Indik Bhuta Yadnya	20
7.	Sarga V Indik Pawiwahan	22
	Palet 1. Indik Sentana	26
	Palet 2. Indik Warisan	28
8.	Sarga VI Wicara lan Pamidanda	29
	Palet 1. Indik Wicara	29
	Palet 2. Indik Pamidanda	30
9.	Sarga VII Nguak Kalih Nguwuhin Awig-Awig	30
10.	Sarga VIII Pamuput	31

SARGA I
ARAN LAN PALEMAHAN
PAWOS 1

1. Desa Adat puniki mawasta Desa Adat Dalem Setra Batununggul.
2. Kekuwub wewidangan pelemahan Desa Adat Dalem Setra Batununggul puniki ngawengku tanah pekarangan saha tegal mewates cawates-watesnya.
 - Wates sisi Wetan : ring luah tukad Sebiah.
 - Wates sisi Kidul : ring Maos lan Banjar Celuk wewidangan Desa Kutampi
 - Wates sisi Kulon : ring luah Sumur Dalem
 - Wates sisi lor : ring tepin segara
3. Desa Adat Dalem Setra Batununggul puniki papulaning ayah krama Desa, krama Ngarep, krama Pengelih, krama Kaputungan, sinanggeh krama Desa.
4. Desa Adat Dalem Setra Batununggul puniki madruwe Banjar Adat akehnyane 5 (limang) banjar luwir ipun :
 - a. Banjar Mentigi
 - b. Banjar Sampalan
 - c. Banjar Geria Tengah
 - d. Banjar Batununggul
 - e. Banjar Sampalan

SARGA II
PATITIS LAN PAMIKUKUH
PAWOS 2

Desa Adat Dalem Setra Batununggul puniki ngemanggehang pamikukuh desa mekadi :

1. Pancasila
2. Tri Hita Karana manut tatwaning Bhuana Agung
3. Undang – Undang Dasar Negara Republik Indonesia Tahun 1945, pingajeng manut ring 18.

PAWOS 3

Luir patitis Desa Adat Dalem Setra Batununggul puniki kasurat sekadi ring sor :

1. Mikukuhin saha ngerajegang Sanghyang Agama
2. Nginggilang tata prawertine megama
3. Ngerajegang kasukertaning Desa Krama, saha kasukertaning pawongania sekala lan niskala.

SARGA III
INDIK SUKERTA TATA KRAMA

PALET 1 : INDIK KRAMA LAN WARGA DESA

PAWOS 4

1. Sane kabawos warga Desa Adat Dalem Setra Batununggul inggih puniki : sehananing jadmaj ring wawidangan Desa Adat Dalem Setra Batununggul, saha satinut ring sahananing awig-awig Desa lan pamargin Krama Desa Adat Dalem Setra Batununggul.
2. Sane kabawos krama Desa Adat Dalem Setra Batununggul, sane sampun merabian, ngamong karang wiyadin tan ngamong karang, nyungsung kahyangan desa, tur satinut ring daging Awig-Awig Desa Adat Dalem Setra Batununggul,
3. Jadmaj nuwed saking desa / Banjar wewidangan Desa Adat Dalem Setra Batununggul sejawaning saking dura desa malarapan ngerereh karya pangupa jiwa lan wiguna lain ipun 6 (nem) sasih, punapi malih kantos madruwe umah, patut nedunin mekrama Desa Adat Dalem Setra Batununggul. Mungguing swadarmannyane, manut perarem desa/banjar/setra.

PAWOS 5

Sahanan krama des akeni ayah pinaka swadarmaning warga desa luire :

1. Krama ngarep ngamarginin ayah krama ngarep
2. Krama pengelih ngemarginin ayah krama ngarep
3. Krama kaputungan ngemarginin ayah krama pengelih
4. Krama kakuwuban utawi doban, utawi dadnan waris saking krama, saha kadi ring ayat 1, 2, lan 3 ring ajeng sane sampun dehe truna (patut ngamiletin Sekeha Truna-Truni) ngemanggehang ayah roban utawi ayah Truna-Truni.
5. Warga kasundulan yang sampun pitulas warsa patut kamarginin ayah-ayahan krama.

PAWOS 6

Pemedalan-pemedalah kalih urunan ring desa kadi ring sor puniki :

1. Krama ngarep kalih krama-krama keni pepeson miwah peturunan mamungkul.
2. Krama kaputungan keni peson-peson kalih paturunan karingan manut kawenten pialangnyane tur nganutin daging pamutus pararem.
3. Banjar patus keni pepeson ring desa manut wiguna reh banjar patus inuap maka tangan sukaneng desa.
4. Prade ring desa wentan pekaryan sane abot, sane patut kerembekengin patut karembo antuk sehananing desa sami.
5. Prade wenten sinalih tunggil krama tan nganutin sekadi ring pawarahing bawos ring ajeng wenang krama inucap keni pamidanda manut pararem.
6. Sapunika taler ring sang mapurung paswaraning bawon inucap wenang katibakin pamidanda.

PAWOS 7

SWADARMANING TAMIYU

1. Sane kabawon tamiyu : sang jumenek mererepan ring Desa Adat Dalem Setra Batununggul nistane awengi ngawit saking :
 - a. Malalungan,
 - b. Sasudian desa utawi guru wisesa,
 - c. Duduk dudukan,
 - d. Masundulung raga,
 - e. Kadang warga utawi kawargan antuk sinalih tunggil krama,
 - f. Ngerereh pangupa jiwa miwah sane siosan.
2. Swadarmania
 - a. Ninutin ring pemargin kerta lan tata kasuptraptian Desa Adat Dalem Setra Batununggul
 - b. Ninutin tata cara Bebanjaran sane ngawidangin.
3. Krama sane ngeraksa tamiyu patut matur supeksa ring Prajuru desa
4. Tamiyu sane sampun merabian tur lanang wadon sareng jumenek ring Desa Adat Dalem Setra Batununggul, kakenin penaub pasewakan krama manut perarem.
5. Tamiyu sesudian Guru Wisesa sane jumenek ring Desa Adat Dalem Setra Batununggul sareng rabinnyane, jantos sasihan keni sumbangan suka duka ring banjar sane ngawidangain.

PAWOS 8

Pemargin krama ring Desa Adat Dalem Setra Batununggul manut pemarginnyane sampun kamanggehang saking dresta, nganutin kawentenang linggih krama, inggih punika wenten pepalihan pemargi sekadi munggh ring ajeng. Yaning marep ring sang kapialang, utawi wiguna krama, indik punika kawentenang laluputan manut ring sor :

1. Sahanan krama Des akeni pemargi lan ayah-ayah kalih kekenan sekadi kasurat ring ajeng (Pawos 5, 6),
2. Laluputan-laluputan pemargi lan ayah-ayah kawentenang marep ring :
 - a. Para Pemangku Desa,
 - b. Sang / utawi krama sane cedangga banget lan sungkan tahunan
 - c. Krama balu,
 - d. Krama ubuh/tapukan
3. Laluputaninuap manut sekadi ring sor punika.
 - a. Para pemangku desa luput ring ayah-ayah la reramuan, miwah urunan yadnya,
 - b. Krama sane cedangga banget lan sungkan tahunan polih laluputan manut alangania,
 - c. Krama balu polih laluputan manut kawentenannya.
 - d. Krama ubuh (alit katinggal yayah rena) ngemarginin sekadi krama tatapukan.
 - e. Prajuru-pajuru, Hansip/manut wigunaniya
4. Patut sungkem ring swadarmaning tatiwak saking Guru Wisesa minakadi Hansip, naur PBB (IPEDA) lan sane siosan.

PAWOS 9

Wusan dados krama banjar sekadi ring sor :

1. Wusan ngemarginin krama sekadi ring sor :
 - a. Seantukan padem pegat ayah-ayahan.
 - b. Sangkaning kesah kadi patut saking Desa Adat Dalem Setra Batununggul, kedulurin surat keterangan/ Ilikita saking Prajuru desa.
 - c. Sangkaning nyada manut saking jalarannya
 - d. Sangkaning kausanang kacabut pipilnya antuk ikrama banjar wit saking banget iwangnya, tur dados mewali dulurin nunas pengampura.
2. Wusan kalih kawusanang antu ikrama panumayannya padgada utawi ngawit putusan perarem.
3. Seng wusan makrama inucap tan kawenang polih pah-pahan druwen banjar yadiastus wenten druwe merupa jinah kas sajawaning sangkaning wenten suka, ikrama banjar genah ipun pecak mekrama.
4. Mewali malih makrama :
 - a. Sangkaning rahayu tan kaptutang keni pabaub wewangunan druwen banjar.
 - b. Yan prade wusan sangkaning tan rahayu utawi kecabut pipilnya, mawali malih makrama banjar, wong inucap patut kekenain jinah ular alir manut putusan perarem tur panuku jinah kas Kas druwe.

PALET 2 : INDIK PRAJURU

PAWOS 10

1. Desa Adat puniki kaenteranga antuk Prajuru Bandesa Adat Dalem Setra Batununggul pinaka pengenter Desa Adat lan :
 - a. Penyarikan pinaka juru tulis
 - b. Petengen pinaka juru raksa
2. Krama banjar kaenterang oleh klian banjar adat. Gaguat pacing dados Prajuru desa utawi banjar patut majalaran sekadi ring sor puniki.
 - a. Saking mued warga Desa Adat Dalem Setra Batununggul
 - b. Meagama Hindu
 - c. Jujur / polos
 - d. Mepolah becik
 - e. Uning memaca lan menulis sane lancer
 - f. Uning ring pengelohan/ wicaksana
 - g. Kesudi / kemadeganag antuk ikrama
 - h. Nganggen wates kala, umpami ipun 5 (limang) masa.
3. Wawaneng wiadin sengker dados Prajuru luire :
 - a. Ngawit saking pengesahan krama
 - b. Wawaneng sajeroning 10 (das) pengetepan
 - c. Yan sampun puput sengker 5 (limang) warsa pemargin Prajuru punika patut keserahang ring krama tur mangda kawentenang sesudian desa
 - d. Prajuru sane sampun puput sengkernuya dados kesudi malih.
4. Kewenangan kaling kemanggehang dados Prajuru
 - a. Patut ngelaksananayang saluwiring keputusan desa sane sampun kasungkemin

- b. Ngawentenang paparuman sane sampun kerencanayang, tur paparuman sane buat-buat
- c. Ngicenin pituduh-pituduh ring banjar-banjar sane wenten ring Desa Adat Dalem Setra Batununggul, parindikan rencana-rencana pawangunan, pangcian ring desa diadin ring pura
- d. Nyaksinin upacara-upacara luir ipun : nganten (masakapan), manusa yadnya, pitra yadnya, lan dewa yadnya, bhuta yadnya lan Rsi yadnya.
- e. Nibakang danda ring warga/krama desa ritatkala ikrama desa nenten nganutin sukertan desa sane sampun kasungkemin
- f. Nenten kekenain pepeson/ururan saluiring penelas prebia wewangunan, pengacian-pengacian tur pekaryan ring desa, wiadin banjar, muah urunan, pepeson sane lianan sane keanggen ring desa adat.

PAWOS 11

Bandesa kalih Prajuru sane nyanggra desa luire :

1. Bandesa Adat Dalem Setra Batunungul : kasanggra antuk Prajuru sane kasudi oleh banjr nyane soang-soang
2. Wawilangan panyanggrane manut abot dangan kawentenan pamargine, palet-paletan pemargine manut desa kala patra, utawi manut paetangan wawirasan Prajuru utawai klian banjar.
3. Sajeroning ngenterang kasukertan niskala, yadnya ring kahyangan desa utawai ngupakara kesucian kahyangan desal an sehanannya kaenter oleh Bandesa Adat inggih punika katuntun oleh Ida Sang Sulinggih. Pemangku Desal an Parisada Hindu Dharma.
4. Bandesa Adat kesanggra oleh Klian Banjar lan Prajuru siosan
5. Para pemangku patut misinggihang pamonia ring Kayangan desa saha patut kesanggra oleh Prajuru istri lan jero mangku istri.
6. Bandesa Adat katuntun olih Ida Sang Sulinggih kemanggehang pinaka Kerta Desa, Kerta Desa wenang metetiwak pamutus lan pamidanda marep ring krama desa, wicara nganinin indik adat, Susila lan agama.

PAWOS 12

Swadarmaning Prajuru Banjar

Swadarmaning Bandesa Adat luire :

1. Ngenterang sehananing pemargi daging kocap awi-awig, pasuaran lan putusan perarem banjar
2. Nuntut tur ngenterang krama banjar, ngupadi sukertan krama manut patitis
3. Maosin kalih niwakin pamutus utawi wewirasan arep wicara warga banjar manut patitis lan awig-awig banjar
4. Maka duta banjar pacing mabaos ring sapasira ugi
5. Maka pangoreg banjar/pemenggala ritatkala mamikukuh banjar, pamikukuh pemargi adat kalih awig-awig, prada wenten wong dura cara kalih pangrusak banjar siosan.

Ritatkala ngeterang pemargin desa krama, I Bandesa Adat patutu ngawentenang :

1. Wewelasan ring Prajuru desa siosan kalih prayogia sane taler kawidangan warga desa mangda tan tangkas pemargi
2. Ngawentenang paetangan galah pinggala desa mangda warga desane polih galah paetangan pacing ngupadi pangupa jiwa, ngutsahayang pangeweruh kalih usaha niri-niri sane siosan.

Prajuru siosan swadarmannya :

1. Wewirasan ring Prajuru
2. Pateh manut ring swadarmaning Bandesa nganutin paetangan wewengkon widangania kalih wigunania
3. Pinaka tangan suku kalih pangrombo pangarep oleh I Bandesa Adat.

Prade I Prajuru iwang sesana utawi ngelinyokin druwen banjar, keni kebuktinyang kaiwangannia antuk para kramane, punapi malih yang banget tempal ring daging awig-awig banjar, lan paruman patut keni pamidanda arta arep ring banjar manut pepareman, saha kengin kerarianang dados Prajuru.

I Prajuru sane kasisipang tan kengin ngenterang kalih nuntun parerem krama duk punika, perarem banjar/ krama katuntun antuk Prajuru siosan utawi ngawentenang gagilihan panitia pararem.

Petias Prajuru Banjar luire :

1. Saluiring kekenan reramuan, kalih sane tiosan polih laluputan
2. Polih cenengan, luwiring dumduman lan tan keni kenan-kenan utawi peturunan
3. Polih ulih-ulih siosan manut kawentenan pamargi manut parerem banjar
4. Miwah sane siosan

PAWOS 14

Ngentosin Prajuru luire :

1. Prajuru Banjar kagentosin majalaran :
 - a. Sampun putus wenang sengker dados Prajuru utawi sampun nemayannya.
 - b. Kelayonana, sang Prajuru lampus utawi seda
 - c. Tan sida ngemargiang pamargi dados Prajuru, sungkan tahunan, utawi pialang abot sane siosan
 - d. Pinunas ngeraga tur sampun kalugra pinunasnya antuk krama banjar
 - e. Kararianang antuk krama duaning iwang pamargi.
2. Ngentosin utawi ngerarianang Prajuru patut kararemin antuk krama banjar sajeroning pararem banjar, tur kawentenang panglokitan sane kesyahan tur kesaksiain antuk Prajuru sane leluran.

PALET 3 : INDIK PARUMAN

PAWOS 15

1. Paruman ring banjar-banjar wawidangan Desa Adat Dalem Setra Batunungkul kadi ring sor puniki :
 - a. Paruman manut panomaya puniki :
 - 1) Sangkepan banjar nyabran ngesasih.
 - 2) Paruman Desa Adat taler nyabran ngesasih.
 - b. Sangkepan padgata kala manut kawentenan utawi manut desa kala patra
 - c. Sangkepan Prajuru kawentenang paling dohnya nyabran 6 (nem) sasih, sakewanten yaning wenten pemarga buat perarem punika padgatakala manut tetujon kalih wiguna.
 - d. Sangkepan Hansip
2. Yan pesamuan /peparuman sampun panemaya utawi patokan tan kewentenang pengarah, yan perarem padgata ngawenteng pengarah-arahan.
3. Sangkep wiadin peparuman banjar patut maduluran kadi munggah ring sor puniki :
 - a. Kadulurin pengarah perade padgata kala

- b. Macihna antuk suaran kulkul manut Pawos 19
 - c. Prasida lumaksaning risampun kertedunin antuk inganan atengah leangkung ikrama sane patut ngamiletin
 - d. Sang pacang parum patut mabusana adat akampuh tur tan wenang agegawan
 - e. Tan maren ngarcana Ida Bhagawan Penyarikan maka sarana antuk “Banten Cane”, utamania ngarcanayang Ida Sang Hyang Widhi Wasa mangda Ida Asung Waranugraha, inggih punika sehanan daging tetujon paruman prasida kapti tur rahayu.
 - f. Pengawit parum patut nyacak dumun, riwus nia sang sangkep ngewilangin dadosan manut perarem.
 - g. Sedurung ngwiwitin peparumane ngaturang panganjali umat kamiletin antuk ikrama inggih punika “Om, Swastyastu” manut tatwa Agama Hindu
 - h. Pamutus bebawosan kausahayang melarapan gilik saguluk, pad arsa krama sami, bilih tan presida gilik saguluk, suara sane akehan kebaos patut kamargiang. Nanging putusan punika taler mangda anut utawi tan banget lepas ring pematut agunge, minekadi Pancasila, Undang – Undang Dasar 1945.
 - i. Putusan perareman punika pengawisesa sane wenang nyelem putihang utawi maka uger-uger gaguat tata pengater desa manut dresta.
4. Prade wenten bebawos sane buat :
- a. Tan prasida mulihang keputusan utawi tan keraremin, I Prajuru patut ngalihang paruman ring bebawos sane siosan,
 - b. Bebawos punika mewali matah utawi kawantunan ring peparuman sane ungkuran
 - c. Prade taler tan presida polih pamutus utawi tan presida mangguh kadikeaptiang, peparuman punika sinanggeh kadi wicara abot ring banjar yadiastus desa tur patut katunasang pamatut ring guru wisesa sane niwakin pamutus manut daging wicara inucap.

PAWOS 16

1. Sane patut kasiarang ring paruman desa lan banjar :
 - a. Munjuk lungsuring makadi ayah-ayahan
 - b. Saluir/kalih sulur arta brana druwe
 - c. Indik pemargi sane mawuwus kaputusan utawi wewangunan
 - d. Rencana Prajuru nganinin usah kepungkur
 - e. Sahanan wicara saha pamutusnia
2. Sahanan sane kasiarang ting ajeng, katibenin saha katiwakin pamutus antuk paruman krama soang-soang
3. Pamutus perareman banjar patut tan lepas ring awig-awig, tur sinagguh pararem maka pamitegep awig-awig banjar.

PAWOS 17

1. Sangkepan Prajuru mageguat kadi ring sor puniki :
 - a. Kawentenang sanistania 6 (enam) sasih apisan nanging yan wenten bawos buat, kangin padgata kala manut wiguna
 - b. Katuntun antuk Bandesa Adat utawi klian adat
 - c. Kasarengin oleh Prajuru banjar muang sahanan klian banjar
2. Tatujoan perareman Prajuru inggih punika : ngericikang pangerencana tata upaya sane patut anggen ritatkala pacang ngelaksanayang saluiring pamargi, punapi malih rencana pewangunan ring banjar yadiastun desa

3. Pamutus sahanan rencana, punapi malih rencana sane niwakinkakenan, utawi pemargi ring krama, durung patu kelaksanayang sedurung kasungkemin tur kapikukuhang antuk paruman banjar manut dudonan.
4. Pamutus parareman Prajuru mawit saking pituduh pasuara krama sane rihinan

PAWOS 18

Sangkepan sekaha sekadi ring sor :

1. Sangkepan sekeha-sekeha kawentenang manut kalih wigunania soang-soang.
2. Panamaya padgata kala.
3. Ngangken ngawentenang sangkepan utawi pacang ngardi kaputusan sangkepan patut atur supeksa riya ring Prajuru banjar, mangda tan lempas kadi patitis awig-awig kalih pawos ring ajeng.

PALET 4 : INDIK KULKUL

PAWOS 19

1. Kulkul utawi gendongan ring sewewengkoning Desa Adat Dalem Setra Batununggul utawi ring banjar-banjar lan pura-pura patut wenten, dudonannya prasida tan baur suaranya minakadi ring sor puniki :
 - a. Kulkul Desa Adat Dalem Setra Batununggul
 - b. Kulkul banjar-banjar Adat
 - c. Kulkul ring Pura-Pura.
2. Swaraning kulkul inucap sinanggeh pinaka swaraning banjar, lan sekeha sat maka atur utawi dudonan mawit saking I krama mantuka ring krama sami.
3. Tabuh tetapkan kulkul soang-soang inucap ring ajeng pastika manut tatujon, tur manur ring pasubaya krama.
4. Pamargi-pamargi sane patut macihna suara kulkul luire :
 - a. Pacang parum
 - b. Pacang tedun mekarya ring banjar, utawi ngayah ring banjar wiyadin desa.
 - c. Pacang ngerantabin utawi mapitulung ring sang kalayuan (warga desa sane seda).
 - d. Pacang ngupa saksi warga sange ngerangkat.
 - e. Tatkala kepanca baya.
5. Tabuh tetapkan kulkul ring Desa Adat Dalem Setra Batununggul saha iha ipun :
 - a. Pacang parum
 - b. Pacang tedun mekarya ring banjar, utawi ngayah ring banjar
 - 1) Tengeran lumrah
 - a) Tengeran tedun ngayah ring pura, mekarya ring banjar, pacang parum suaranya kalih tuladan sedeng, utawi sekadi sane sampun memargi ngesasih.
 - b) Tengeran ritakala wenten sinalih tunggil warga desa kalayonan (seda) suaranya kalih tulada sedeng
 - c) Tengeran ritakala wenten warga desa istri ngerangkat suaranya tigang kelentungan sedeng.
 - d) Tengeran ritakala wenten warga desa lanang ngerangkat suaranya limang kelentung sedeng.
 - e) Tengeran ritakala wenten warga desa lanang istri tunggil banjar suaranya 8 (akutus) kelentungan sedeng.

- 2) Tengeran tatkala kapanca baya :
 - a) Jiwa baya upami kaamuk, kabaak, kaculik, kaplegandang, kapandangan, yuda, miwah sane siosan, suarane bulus.
 - b) Geni baya, kebakaran, anyud, linuh, miwah sane lianan suaranne bulus.
 - c) Ritatkala warga desa wenten sinalih tunggil ketibanin baya inucap ring ajeng manut dresta se-Desa Adat Dalem Setra Batununggulsane ngewengku Panca Banjar adat sami nyuarang kulkul bulus saha krama Desa Adat tedun matatulung ring sang keni Panca baya.
- 3) Tengeran Wali ring Pura :

Satunggil Wali ring Pura ngawit pemargi sane patut kacihnayang ritatkala Batara tedun mahias, malelasti, kulkul ring pura kasuarayang negteg utari nyangsih manut kweh kulkul.

PAWOS 20

1. Kulkul banjar patut kasuarayang olih Prajuru utawi sang kapituduh antuk I Prajuru manut tetujon.
2. Yang tan wenten pituduh antuk I Prajuru desa utawi banjar maka jalaran nyuarayang kulkul, sang nyuarayang (nepak) patut keni pamidanda.
3. Yang sane sinalih tunggil krama keni panca baya, wong inucap utawi krama banjar siosan sekuubing Desa Adat Dalem Setra Batununggul patut supeksa maka jalaran buat tetujon panepake.

PALET 5 : INDIK DRUWEN DESA

PAWOS 21

1. Sane kemanggehang druwen Desa Adat Dalem Setra Batununggul inggih punika :
 - a. Pura Dalem
 - b. Pura Mrajapati
2. Setra wenten asiki (1) sane kakuwubin antuk 5 (limang) banjar luire :
 - a. Banjar Mentigi
 - b. Banjar Sampalan
 - c. Banjar Geria Tengah
 - d. Banjar Batununggul
 - e. Banjar Tain Besi
3. Tanah Pelinggih Pura.
4. Tanah linggih wewangunan druwen banjar upami Balai Banjar.
5. Tanah pekarangan banjar
6. Margi sajeroning wewidangan Desa Adat Dalem Setra Batununggul.
7. Piranti-piranti druwen banjar luire :
 - a. Wewangunan Kayangan Desa sekeluir kadruwe ring kayangan inucap
 - b. Balai Banjar sekeluirnya.
 - c. Bale kulkul
8. Pelangan sekadi tetabuhan lan ilen-ilen luire :
 - a. Ilen-ilen wali ring pura
 - b. Gong
9. Pratima-pratima.

10. Sehanan sane kedruwe antuk banjar patut keraksa kapiara, kapahayu antuk krama banjar sami, maka pingajeng oleh Prajuru banjar wiyadin Prajuru desa.
11. Prajuru banjar wenang ngetangang druwen banjar midabdabin ungguhannya, wewidanganannya, sapacarannya, kegunaannya/wigunannya, utawi yening wenten druwe sane patut keanggen, tatkala marebeanin wewangunan banjar / utawi pura keanggen pengaci / yadnya ring abanjar.
12. Sehanan druwen banjar kaungguhang ring ilekita sane pasti antuk Prajuru saparindikan pemargi.
13. Nyabran paruman banjar wiyadin desa patut kesiarang / keserahang antuk I Prajuru manut sane wenten ring ilekita.
14. Krama banjar wenang nitenin tur mastikayang druwe sami manut ilekita punika.
15. Prade wenten druwen jagat/desa/pura lan banjar sane ical sang sapa sira sane memandung / memaling wenang keni danda saha ngwaliang barang inucap.
 - a. Yening wenten prade tan ngangken ngambil druwen punika patut/jagat/desa/pura lan banjar keni medewa saksi.
 - b. Prade wenten krama nenten rauh sejawaning alangan patu matur uning ring Prajuru.
 - c. Prade wenten sinalih tunggil krama banjar sane ngambil / memandung sane suci patut keni pemindanda lan pamerascita.

PALET 6 : SUKERTA PAMITEGEP

KAPING 1 : KARANG TEGAL

PAWOS 22

1. Yan wenten kerasayang ngalikadin utawi rangka patut katepasin antuk Prajuru yan pada arsa kangkat ngangge patok saking guru wisesa (Agraria).
2. Prade wenten karang utawi tegal sane kabebeng, patut kausahayang pemesu utawi rurung. Kawentenang sekadi inucap patut maduluran pasuakan utawi atur piuning ring sang madruwe tegal utawi karang mangdane adung wirasa tan kehanan pekobet. Yaning tan kelugra atur aksmane ring sang madruwe tegal utawi karang inucap, selantur ipun aturang indike ring Prajuru banjar utawi desa. Bilih I Prajuru taler nenten kalugra taled aksamane tunasang pematut ring sang rumawos utawi ring guru wisesa.
 - a. Sinalih tunggil krama banjar tan kalugra ngelalahang tanah pekarangan , tegal padreben anak siosan, napi malih kadruwe antuk banjar sane mabuat suci minakadi linggih kahyangan, setra, margi miwah sane siosan.
 - b. Yan wenten krama melaksanan kadi ring ajeng wenang katiwakin pamidanda luire :
 - 1) Ngewaliang tanah sane kelalahang.
 - 2) Pamidanda penguak suara ring banjar.
 - 3) Yan sane kelahlah merupa genah sane suci krama inucap keni danda pengurakara.

KAPING 2 : PEPAYONAN

PAWOS 23

1. Metetanduran kekayonan, tanem tuwuh sane ageng, yoga adepa agung saking wates karang mangda tan ngererebin/mayanin ring tiyosan.
2. Prade wenten tanem tuwuh sane ngarerebin utawi sinanggeh pacang mayanin kapisaga wenang kewara, medasar paiguman sane becik, mangda kakayonan punika digelis kerebah utawi ketebtebin / totorin.

3. Yan wus kewara kadi ucaping ring ajeng sang nerebaang tan satinut, utawi nenten nagingin pinunas sane nguara, sang rumasa karebrenban ajering pacang kebayanin patut nyadokang ring Prajuru banjar.
4. Prajuru wenang meritiaksayang maweh panyepat pamutus arep ring sang nrebeang kakayonan inucap mangda digelis karebah kakayonan sane kewara.

KAPING 3 : WEWANGUNAN

PAWOS 24

1. Sehanan krama banjar sane ngewangun, nenten kawenangan nyacap kapisaga.
2. Sehananing wewangunan / genah sane ring tengah (tan wenten margi) patut kaicenin margi. Ukuran ipun apemagan (pepagan) ngantos ring margi ageng.

Syarat-syarat dados ngewangun :

1. Nenten kawenangang nyapcap kapisaga.
2. Wewangunan sane kawangun olih I krama mangda ngawantun ring genah nyane soang-soang.
3. Wewangunan banjar mangda ngewangunin genah banjar (biaya banjar)
4. Wewangunan desa wewangunan sane kewangun antuk desa tur kebiayain antuk desa.
5. Sane tan tinut ring sedaging awig-awig inucap katiwakin danda manut kadi pamutus perareman.

KAPING 4 : INDIKWEWALUNGAN

PAWOS 25

1. Sehanan warga banjar ring sekuwubin Desa Adat Dalem Setra Batununggul sane mamiara wewalungan patut sayogia nitenin wewalungan, upami : negul, ngelogor, mangda tan ngerusakin karang utawi pabinan krama siosan bilih-bilih nyantoso ngaletihin kahyangan.
2. Prade wenten wewalungan malumbar utawi galak jantos ngersakin pekarangan/ pabianan risampune kaplungguhang / polih kewara, kengin kataban tur kasadokang ring Prajuru, I Prajuru wenang mamidanda sang nerebenang manut pararem tur kapatu keni kerugian, nawur penebus asing sane karusakin.
3. Prade ngeletihin genah suci risampune kaparitas oleh I Prajuru sang nerebang patu keni pamidanda, tur saha ngupakara Kahyangan inucap manut purana.
4. Tan kawenang ngangonang utawi negulang ring genah sekadi ring sor :
 - a. Margi-margi agung utawi rurung ring desa
 - b. Setra, alun-alun
 - c. Genah-genah rauhing pekarangan wewangunan banjar.

PAWOS 26

1. Sehanan warga desa sane melihara ayam melumbar ring pekarangannya soang-soang, utawi ring tegal pabianan rikenjekan sasih metetanduran / metajuk, patut ayam-ayame samian ketekepin utawi kategul, mangda nenten kantos ngarusakin tetanduran. Lamin ayame kategul utawi katekepin mayusa 15 (limolas) rahina ngawit saking matetanduran.
2. Sang madruwe tegal pabianan patut masadok ring sang madurwe ayam ritatkala jagi matetanduran.

3. Prade sang madruwe ayam nenten kayun utawi tan ngalinguang pesadok sang madruwe pabianan ayame punika kengin kajuk ring sang madruwe tegal pabianan tur kasadokang ring Prajuru desa lan banjar. I Prajuru wenang niwakang pamidanda ring sang madruwe ayam manut pararem.

KAPING 5 : INDIK RERESIK MIWAH KEBERSIHAN WEWIDANGAN

PAWOS 27

1. Sehanan warga banjar adat ring sakuwubing Desa Adat Dalem Setra Batununggul kapatutang memelihara kebersihan wawidangan soang-soang, upami pekarangn margi agung, rurung, kahyangan alan sekeluiring sane ngardi keresikan Desa Adat Dalem Setra Batununggul.
2. Kawenangang sanunggil purnama lan tilem krama desa adat ngawentenang pebersihan kadi munggah ring ajeng manut wates pembagiannya soang-soang.
3. Kapatutang sahanan pekarangn mangde wenten genah mis (bak sampah) utawi kekaryanang blumbang sane matetujon genah mis (sampah).
4. Sahanan pekarangan warga desa mangda madruwe WC sane metetujon matriaksayang reretik / kebersihan desane.
5. Ngupadiang mangdene pekarangan manggeh kebersihannya warga desane tan kaptut makarya kendang bawi ring sejeroning pekarangan sakewanten mangdene kakaryangnang waduk metetujon anggen genah kotoran bawi inucap.
6. Tan kalugra makarya kekotoran ring tepin segarane upami ring biase makabotan nenten pisan kengin pengptine mangdene keasriane langgeng kepangguh.
7. Sehanan warga desa sane madruwe pekarangan peumahan nepiring margi agung / nelajak mangde memelihara kebersihannya, sapunika taler got-got sane wenten ring tepin margine lan limbanya sane metandengan manden kesalurang sepatutipun.
8. Sapunika taler ring sajeroning pekarangan / paumahan mangdene wenten sane kawastanin karang kitri, karang sari lan apotik hidup.
9. Reresike ring genah pasiraman jagat lan sumur genah ngenemang wewalungan minakadi banteng patut kawentenang sekirangnya amasa apisan sapunika taler sumur sane kasuciang rikalaning wenten upacara manusa yadnya, pitra yadnya, dewa yadnya, bhuta yadnya, jagi ngemargiang ngening.
10. Soang-soang krama desa nguren kapatutuang miara asu wantah aukud. Asu punika mangde macihna minakadi makalung.
11. Prade wenten mamurug arep reng ajeng keni pamidanda manut perarem.

KAPING 6 : INDIK SEKEHA TRUNA TRUNI, SEKOLAHAN, LAN PENGHIJAUAN

PAWOS 28

1. Sehanan warga desa sane sampun munggah teruna miwah deha, patut ngeranjing Sekeha Truna Truni manut bebanjarannya soang-soang.
2. Sehanan warga desa yan madruwe putra sampun mayusa 6 (enam) warsa patut kasekolahang sanistanya tingkat sekolah dasar.
3. Sahanan warga desa sane sampun maputra kalih diri yadiastun lanang lan istri mangda nyarengin milet Keluarga Berencana.
4. Sehanan warga desa sane madruwe oka pinih akeh 5 (limang) warsa mangdene ke Posyandu.

5. Wewangunan ring pertanian bebuat pisan mecikang tanahe sane berag sane metetujon ngemanggehang upon-upon mangde ningkat. Sajeroning usaha ngamokohang tanahe sane berag (utawi kritis) siosan ring ngerabuk taler sane dahat mabuat pisan inggih punika “Penghijauan” upami ipun ring pinggir-pinggir tegala mangda katenemin gamal, lantoro gung, bunut, waru, intaran, rumput gajah, turi miwah sane siosan. Gegunan ipun nyegat tanah anyud taler kengin anggen teteduhan banteng.

KAPING 7 : INDIK BAYA LAN DUSTA

PAWOS 29

1. Sehanan pelaksana sane tan rahayu sane ngawinang pakobet duhkita, duskerta, ring wong utawi krama banjar, sinanggih baya.
2. Sane kasinanggih baya utawi panca baya luire :
 - a. Jiwa baya, keamuk, kebaak, kaplegandang, keculik,
 - b. Arta baya, kamalingan,
 - c. Geni baya, puun, linuh, miwah sane siosan.d
 - d. Dura cara ring agama.
 - e. Belabar anyud.

PAWOS 30

1. Sahanan warga desa saketiban baya yogya digelis matur supeksa ring I Prajuru utawi sang wenang mawosin.
2. Sehanan warga banjar sane uning ring wenten jadma melaksanan dusta patut digelis matur supeksa ring Prajuru.
3. Yan prade ketiban baya upami : jiwa baya, arta baya, geni baya, kaplegandang, sang katiban baya inucap wenang digelis nyuarang kulkul tur matur supeksa ring pajuru utawi kengin nunas pitulung ring guru wisesa mekadi : Polisi, Hansip, miwah sang kepatut ngawenang.
4. Sehanan warga banjar patut seyogya mapitulung ngerembo saha gegawan manut kawentenang baya punika, tur patut ngarembosang kenibaya, manut duh kitan nyane, mangde sang kaduh kitan polih katulungan.

PAWOS 31

1. Yan prade pacang maseserep utawi ngeledah ritatkala kemalingan arta baya patut nunas pangupasaki dumun ring Prajuru, Klian Dusun utawi Kepala Desa.
2. Meseserep sios bebanjaran utawi desa patut polih penguak ring Prajuru utawi Klian Banjar inucap.
3. I Prajuru patut waspenek ring pratingkahe maseserep manut awig-awig.

PAWOS 32

1. Sehanan wong melaksanan dusta, ngiwang baya, patut keni pamidanda ring banjar, taler katiba ring sang kabayanin ngaskara manut kawentenan baya inucap, tur katur ring guru wisesa.
2. Yan prade mayain, ngamalingin, sane kasinanggeh suci patu pamidanda punika mawehin pangaskara caru utawi prascita.
3. Sang melaksana dura cara ring Agama, prada kachina manut Tri Pramana, wong inucap keni pamidanda panegteg aksara.
4. Yan dusta saking dura desa, patut kajuk, raris keaturang ring sang ngawenang.

5. Yan wenten krama desa / banjar malaksana duskerti, saluir asta cepala, wakcepala, ring warga banjar siosan patut keni pamidanda : inggih punika yan marep ring sang pasinggihan/singgihang manut Susila lan agama, wong inucap patut keni pamidanda pemerascita marep ring sang sane makardi duskerti.
6. Yan ana wong nguaman-uman, kroda mayuda ring sangkepan, ring pura, wong inucap patut keni pamidanda lan pemerascita.

KAPING 8 : PANGUNYAHAN BANJAR

PAWOS 33

1. Krama banjar ritatkala ngawentenang karya suka duka patut polih pangunyahan banjar (karombo) antuk krama banjar ring soang-soang banjaran kadi ring sor.
 - a. Rikala yadnya manut pinunas sang meyadnya.
 - b. Rikala ngewangun Pitra Yadnya, manut pinunas sang mayadnya.
 - c. Banjar rikala mapitulung ring kaduhkitan utawi pitra yadnya pasajine sasidan-sidan.
 - d. Prade wenten pakaryan banjar, I Prajuru banjar siosan ngamargiang pangunyahan manut dresta, utawi sane madruwe lelanguan ngaturang tetangguran sakantukan rumas panukun banjar maka tangan sukuning banjar.

SARGA IV

SUKERTA TATA CARA AGAMA

PALET 1

PAWOS 34

Pura-Pura sane wenten ring Desa Adat Dalem Setra Batununggul luire :

1. Pura sane ngeranjing Kahyangan Tiga.
2. Tiyos ring pura inucap wenten malih Pura-Pura Merajan/Pajenengan sane kasungsung antuk pangempone soang-soang.
3. Indik piodalan Pura-Pura inucap kawentenang nyabran 6 (enem) sasih apisan tur upacara punika manut kawentenannya.

PAWOS 35

1. Ring Pura-pura, sane yogya pacang ngenterang/nuntun sahanan yadnya utawi ngastawayang ring pura inucap.
2. Sane patut kasudi dados pamangku luire :
 - a. Warga krama desa adat marep / wiadin sampun nyada.
 - b. Katurunan mangku sane sampun-sampun.
 - c. Rahajengan tur mapolah rahayu
 - d. Maagama Hindu
 - e. Madasar sasudian ring krama desa.
3. Nyudi pemangku / ngalinggihang dados pemangku patut nganinin gaguat sane ring ucaping darma kepemangkuan, tur tan ngalempasin sastra lan agama.
4. Sane tan kawenang dados pemangku luire :
 - a. Wong cedangga

- b. Amungpang laku
 - c. Sang tan kararemin antuk banjar.
5. Dudonan pacang dados pemangku luire :
 - a. Kararengin antuk krama banjar
 - b. Nunas wara nugraha ring pura melarapan wawantenan / pawintenan.
 - c. Mawinten / nyuciang raga kapuputang olih Ida Sang Sulinggih.
 6. Sang kasudi dados pemangku desa riwus puput pawintenannya, patut kapinggihang manut wigunannya tur kamarginin saulah pamargi pemangku desa manut pamongnya.

PAWOS 36

Swadarmaning Pemangku :

1. Aswaka darma astiti bakti ring Ida Batara Sesuhunan utamany ring Ida Sang Hang Widhi Wasa.
2. Ngenterang, ngastawa sahanan upakara/upacara ritatkala patirtan utawi yadnya siosan ring pura.
3. Ngastawayang / ngokasang ritatkala wenten krama pacang ngaturang punia punagi mapenauran utawi nunas kerahajengan ring pura.
4. Ngelaksanayang sehanan babuat suci ring pura, nedunang utawi ngalinggihang Ida Batara utawi Pralingga.
5. Ngaturang aturan ngangken rareraianan purnama muang tilem.
6. Nuntun krama siosan mangda setata bakti ring Widhi tur melaksana susiala manut agama.
7. Pemangku-pemangku desa yogya nyiratang tirtha ring krama sane siosan sakewanten yan ring krama sane ksinanggeh patut sangkaning keluarga antuk sang kasiratin.

PAWOS 37

1. Ritatkala nganter yadnya utawi patirtan ring pura pemangku pura desa inucap patu :
 - a. Pinaka pengater pengarep ring pura.
 - b. Yogya polih pengerombo ring pemangku-pemangku siosan.
 - c. Yogya niwakang pituduh ring mangku sanak/mangku siosan lan marep ring krama desa siosan.
2. Yan prade jero mangku sane marep keni kapialang jantos tan presida ngamargiang upakara ring pura patut upakara kamargiang olih pemangku sane siosan utawi yogya nuur Ida Sang Sulinggih.
3. Yan ana pemangku kena ujar ala, pemangku inucap patut kaprayascita, kasepuh olih krama desa, sang maweh ujar ala, lan ulah ala kakenen pamidanda manut pararem.
4. Yan ana pamangku kabuktian anumpang laku nyasar ring sesana, pemangku inucap tan wenang kasepuh tur tan syah nunas pematut ring sang sulinggih utawi sang kapatut maosin.

PAWOS 38

1. Sehananing aturan/sesangi, aturan-aturan asta, leluwes, mule-mule, muah sekeluiripun patut kadruwe ring pura.
2. Sehanan wong sane pacang maturan mapenauran sekadi inucap ring ajeng patu masadok ring Prajuru mangda kaastawayang antuk jero mangku aturan inucap patut kaunggahang ring ilekita.
3. Sehanannya sekadi inucap ring ajeng wenang keangge ring pura manut tatujon.
4. Sarin canang kepeah 3 (tiga) minakadi katur ring : pura, pemangku, lan desa adat.

PAWOS 39

Ngentosin pemangku luire :

1. Ngentosin pemangku mimitan sangkaning ring sor :
 - a. Kelayuan / jero mangku seda.
 - b. Pinunas saking jero mangku inucap, seantukan sampun lingsir.
 - c. Jero mangku kausanang malarapan sangkaning kanorayang / melaksana dusta.
2. Prade jero mangku kausanang sangkaning kararianang utawi melarapan saking malaksana asta dusta pemangku inucap patut keni pamidanda ngawaliang pawintennya pecak manut pararem.
3. Prade jero mangku malih ngarap rabi sangkaning rahayu, utawi tan sangkaning dusta / pemaksaan patut l pemangku nyapuhin raga tur kayogya antuk l Prajuru banjar.
4. Yaning jero mangku desa lina utawi seda kepatut kageseng / atiwa-tiwa, sekeluiring prebea upacara/upakara pretekena kelaksanayang olih krama desa, manut kawentenang nista, madya, utama.

PAWOS 40

Kahyangan kadurmangalan :

1. Kawentenan ageni baya.
2. Kependungan.
3. Toya baya
4. Baya cabul.
5. Sander kilap.
6. Cuntakan kematian.

Kasukertan Kahyangan kadi ring sor :

1. Sehanan krama banjar lan warga sami patut nureksa nyaga mangda kasukertan kalih kasucian kahyangan desane tan kaletehin.
2. Sane tan kalugra ngeranjing kesejeroning pura :
 - a. Sang sebel ring raga, raja sewali, durung tutug akambuhan.
 - b. Cuntaka mawit sangkaning kelampusan manus senger.
 - c. Jadma sane sinanggeh patite : panak bebinjat, beling tan wenten ngangkenin, tan kasinangaskara, jadma buduh, sakit ila, muang sekancan cendala siosan sedurung polih kaprayascita manut agama.
 - d. Sato ageng sajawaning mapepada.
 - e. Babusana sane tan patut manut tata Susila ngeranjing ring pura.
 - f. Sadurung polih wak-wakan saking l Prajuru.
 - g. Makta barang sane kasinanggeh letuh, manut agama luih ipun : barang mawit saking watangan, layuban pitra yadnya.
 - h. Sehanan sane tan kapatutang manut pararem cendala siosan sane kabaos ngeletehin.
3. Pratingkah laksana sane tan kawenang ring pura :
 - a. Masumpah / naap cor, sejawaning sangkan pituduh utawi kawekasan olih Prajuru.
 - b. Maujar ala, ulah ala, wakparusia.
 - c. Mejaljal, mayuda, punapi malih jantos metu rah kabos ngaletehin.
 - d. Mecikang wastra, mecikang pusungan, muah sane siosan.

- e. Mekoratan / mekabotan, anguyuh, makolem lanang istri nemuang samara dudu, muang sane siosan.
- 4. Yan mabukti wenten jadma utawi krama sane melaksana kebaos ngaletihin sekadi inucap ring ajeng keni pamidanda manut pararem. Yan prade kabaos banget ngaletihin sekadi mayuda meturah, masanggama, makta barang sane leteh, kahyangan inucap patut kaprayascita, sang melaksana keni pamidanda artalan pemerascita.
- 5. Yening kahyangan desane keni kadurmaggalan sekadi ring ajeng I Pemangku patut digelis nyadokang ring I Prajuru mangda marumang krama desa pacang ngawentenang pangupakara sepatutnya.
- 6. Yan wenten wong edan jantos ngerusak pura, inggih punika palinggih, utawi siosan, wong inucap utawi sane madruwe jadmane punika patut mecikang sehanan sane karusak tur keni pemerascita manut purana.

PALET 2: INDIK RESI YADNYA

PAWOS 41

Indik Resi Yadnya ring Desa Adat Dalem Setra Batununggul kemargiang manut kerta pamargin pawisik agama.

PALET 3 : INDIK PITRA YADNYA

PAWOS 42

1. Sehanan upakara mereteka sawa, kabawos pitra yadnya, sekadi : mersihin sawa, mendem, ngeseng sawa, atiwa-atiwa, wus punika kelanturan antuk upakara Pangeroras ngangkid utawi nuur rahuing ngelinggihang ring pahriyangan Dewa Hyang Betara duluran upakarannya nganutin kecap Yama Tatwa kalih purana, kadulurin tirta pengentas saking paica Ida Sang Sulinggih.
2. Yan warga Desa Adat Dalem Setra Batununggul wenten lampus utawi seda sejeroning rahina, wenten upacarannya luire :
 - a. Wenten sane ngeraris kependem, indik upakarannya sasidan-sidan manut kawentenan sang kalayuan, sasampune ketigang rahina kekaryanang upakara sane kawastanin nigung rahinanin.
 - b. Wenten sane keaben antuk upakara sane amadya manut kawentenannya.
 - c. Wenten sane ngeraris atiwa-atiwa manut kecap Yama Tatwa, kaduluran tirta pengentas saking paican Ida Sang Sulinggih.
 - d. Wenten mendem ring geni/kageseng sakewanten nenten niwakang tirta pengentas. Kapungkur yaning sang kalayuan meresidayang nabdab pitra yadnyane kengin keaben.
3. Mendem sawa, ngeseng utawi mendem sawa :
 - a. Yan sang lampus wus pupak / ketus untu patut nganutin padewasan pangutangan sawa, yan rare / anak alit durung pupak, dados premangke tan ngantos dewasa.
 - b. Genah mendem ring setra ugi/setra bebajangan.

PAWOS 43

1. Pemargin padewasan mendem utawi atiwa-atiwa taler kapidabdab nganutin paetengan desa, kala, patra, upani yan katuju wenten yadnya ring jagate utawi ring desa, upami Kahyangan Agung, karya ring Pura.
2. Yan prade sang kabukti kalampusan kawenangnyane kobet (dahat kamewehan), pemargine makekingsan sawa ring setra premangkin sakewanten masesiliban tan ngangge gagumuk. Pemeretekalan pangupakara sang lampus kelaksanayang sesampune puput pula pali karyane ring pura manut paetangan dewasa sane sinanggeh becik.

3. Yang presida wenten krama kalampusan ritatkala wenten wali ring paibon / pahryangan utawi merajan pemargine mendem sawa risampune puput sang madruwe paibon ngaturang puja wali.
4. Ritatkala wenten krama banjar lampus katuju rahina pasaran (pasha) tan kalugra mendem.

PAWOS 44

1. Prade lampus sangkaning salah pati, ulah pati miwah siosan sakeluir ipun kengin kabakte budal pretekannya wantah abersihan tur kasanggara antuk pangulapan, banten panebusan wus punika patut kakingsanang premangkin.
2. Riwus matuuh asasih pitung rahina wenang kapretek kadi patut banten pemendem.
3. Yan ana wong istri lampus ngadut manik tan wenang kapendem sadurung bobotannya empas (patut kamedalang dumun)
4. Prade wenten padem ring pabianan / tegalan, sang madrebe utawi raris patut merascita lan pecaruan alitnya amanca warna, manca sata, kelaksanayang ring genah inucap mewaneng sadurung asasih pitung rahina.
5. Prada wenten wong padem ring tepi siring wawidangan Desa Adat Dalem Setra Batununggul tan keni kelingan sesampune kapituduh antuk guru wisesa, wong padem punika wenang kapendem ring setra kelaksanayang antu banjar / desa sane ngawidangin. Upakara pemerascita / keletehan desane kemargiang antuk desane.
6. Prade yang wenten krama saking sios desa pancang mendem, utawi pacang metempung ngaben ring banjar / Desa Adat Dalem Setra Batununggul patut keni pananjung batu, panukun setra pararem muah tan polih panyanggran banjar.

PAWOS 45

1. Paromboyan krama tatkala kalayuan sekadi ring sor, krama sane kaduhkitan / kalampusan.
 - a. Krama sane kelayuan patut digelis nyadokang ring Klian banjar apti nunas tatimbang ring Prajuru indik tatujon pemargine manut kawentenane.
 - b. Nunas paromboyan krama banjar / desa anut pemargine.
 - c. Ngaturin krama banjar panyembrama sakewantennya.
2. Prajuru adat kapatutang :
 - a. Maritetes tatujon pamargin sang kaduhkitan manut kawentenan.
 - b. Krama kalih wargo ngarombo sang kaduhkitan, sepatunya manut pamargin derestane.
 - c. Ngemargiang patus manut pidabdab pamargin patus sane sampun kaanutin ring perarem.
 - d. Nyuarang kulkul manut dudonannya.
3. Krama banjar / desa kapatutang sekadi ring sor :
 - a. Nedunin patus sane keraremin manut pemargine
 - b. Krama banjar kalih warga ngarombo sang kaduhkitan sepatunya manut pamargin dresta.
 - c. Ngemargiang patus manut pidabdab pamargin patus sane sampun keanutin ring perarem.
4. Rikala ngemargiang / nyandang sawa utawi nyandang pamereman / wadah sakeluirnya, saha upakarannya, pemargine ke setra mangde dabdab seethe-ete upakarane, pamereman, sawa, wadah, petulangan lan seluir ipun tan kengin karusak, tan dados ngarap sehanan pamargin upakara mawesana rahayu.
5. Yaning ritatkala nyanggara pemargin kelayu Sekaran pacang mapendem patu mabusanan adat amadya. Yening pemargin atiwa-tiwa patut ngangge busana adat jangkep, tan kapatutang bebungahan.

PAWOS 46

Yan kalaning patirtan / pangusaban ring Pura Desa sadurunge Ida Batara katuran wali / patirtan tan kalugra mendem.

PAWOS 47

Indik cuntaka sekadi ring sor :

1. Sang kacuntaka tan kengin rawuh / ngeranjing kagenah utawi palinggih sane kasinangguh suci, punapi malih ring Pura-Pura desa.
2. Luire sang kehanan cuntaka :
 - a. Raja Swala
 - b. Wit ngembas putra.
 - c. Keruron.
 - d. Kalayuan / kapademan.
 - e. Nyambut karya Pitra Yadnya.
 - f. Miwah cuntaka sane sionan manut pemargi.
3. Manut sengker cuntakane manut jalaran kawentenannya sekadi ring sor :
 - a. Raja swala, tigang (3) rahina ngawit saking ngraja swala.
 - b. Ngembasang putra, petang dasa kalih (42) rahina nbawit saking putrane embas kantos sampun kaupakara makambuhan.
 - c. Karuron, cuntakannia ngawit saking kapademan.
 - 1) Sebel bebanjaran, jantos tigang (3) rahina wusnya mendem.
 - 2) Sesebelan kluargannya sajeroning pekarangan kantos pitung (7) rahina.
 - 3) Yan kalampusan yayah rena, sebel bebanjaran jantos tigang (3) rahina, sios pekarangan tigang (3) rahina, sang madruwe kalayuan jantos pitung (7) rahina.
 - 4) Yan anak alit seda sedurung kepus pungsed, sesebelan reramnya jantos petang dasa kalih (42) rahina.
 - 5) Sang sedeng nyambut karya Pitra Yadnya, cuntaka ngawit saking ngulapin jantos pitung rahina riwus yadnyane.
 - 6) Yan ritatkala sedeng nyambut karya / yadnya ring pura Dalem / Desa, sane polih pialang sebel wantah sang ngarapin, kalih pengapitnya kemawon.
 - 7) Sahananing kesatuan tapsir Parisada Hindu Dharma Indonesia, sane sampun lajer kemargiang sekadi patut.
4. Sane tan keneng cuntaka / sebelan :
 - a. Ida Sang Sulinggih
 - b. Para Pemangku Desa

PAWOS 48

1. Sane kapatut keabenang sekadi ring sor :
 - a. Sahanan sawan sang sampun apupak / maketus untu.
 - b. Sawan sang kebawos letuh wenang kaabenang riwus puput sengkernya tur kaprascita manut agama.
2. Sinalih tunggil krama yan pacang atiwa-atiwa patut ngemargiang patus (suka duka)

3. Tingkahe ngangge patus, wenang ngangge patus bebanjaran.
4. Tatkala memargi patiwan masa, patus banjar ngemargiang pakaryane ring soang-soang bebanjaran manut pemargin patus suka duka sane kararemin.

PAWOS 49

1. Yan kalaning patetiwan masa padgatakala pemargine kadi ring sor :
 - a. Ngerisakin margine rauh ring setra.
 - b. Ngaryanin rompok
 - c. Ngaryanin tatakan api / prapen.
 - d. Ngaryanin pesanggrahan / bae pawedan.
 - e. Nangiang / ngebet sawa/tulang.
 - f. Ngaryaning wadah lan eteh-ete upaka tiosan jantos nganyut / ngeseng.
 - g. Sajawaning inucap ring ajeng, taler manut paigum lan pangenter Prajuru.
 - h. Nganyut.

PAWOS 50

1. Yan wenten krama saking sios desa ngabenang sawa, utawi matempung saking desa siosan, krama inucap patut sadurungnya nyadokang ring Prajuru tur naur kenan-kenan sekadi ring sor :
 - a. Panukun setra
 - b. Pananjung batu
 - c. Pangungkap lawing.
2. Sehanan / saluiring aturang ring pura Dalem mawit saking penukun setra, penangjung batu, pengungkap lawing, penebus atma, manggeh druwen desa tur kemanggehanag ring ilekita.
3. Prajuru – Prajuru miwah pemangku rig Dalem patut polih pahpahan saking aturan inucap manut saking pararem.

PALET 4 : INDIK MANUSA YADNYA

PAWOS 51

1. Manusa yadnya inggih punika upakara harmaning manusa saking patemoning kama bang lawan kama petak sajeroning garba wasananing ibu jantos lampus.
2. Upakara lan upacara manusa yadnya luire :
 - a. Kepus pungsed/odel/ngelepas awon.
 - b. Tutug kambuhan / majangin / risampun roras (12) rahiha
 - c. Rarene mayusa tigang sasih.
 - d. Rarene mayusa aoton ring Desa Adat Dalem Setra Batununggul wenten upacara nyambutin (Ngangkid ka segara) lan upacara nepat siti (Keni tanah) raris makepit rambut, wiadin tigang oton.
 - e. Matebasan sane sampun mungguh daha.
 - f. Mapandes
 - g. Mawiwahan.
3. Upacara-upacara inucap/ajeng nganutin kecap agama nista, madya, utama nganutin dresta, muang sima/cara belajar lan ring desa Batununggul.

PALET 5 : INDIK BHUTA YADNYA (CARU DESA)

PAWOS 52

1. Bhuta yadnya inggih punika sahanan upacara taur ring pretiwi lan ring widangan desa, kahyangan sarwa bhuta kala.
2. Upacar-upacara pabyakalan ring sarwa prani :
 - a. Sarwa tumuwuh rig tumpek wariga.
 - b. Sarwa prani / ingon-ingon ring tumpek uye.
3. Upacara taur ring pretiwi miwah kahyangan lan sarwa bhuta kala kabawos macaru luih ipun : Eka Sata, Manca Sanak, Pamalik Sumpah, Taur Kesanga, Yadnya Sesa/Ngejot kalaning wus merantenan.
4. Sajawaning manusa, masayut galungan, natab banten kasanga.

PAWOS 53

1. Upacara taur kasanga / ritatkala tilem kasanga patut ngelaksanayang kadi ring sor :
 - a. Ring perempatan agung, kawentenang pecaruan eka sata, agung alit, pengambilane nganutin desa kala patra sanistannya caru manca sata, kawentenang amasa apisan, lan selantur ipun pateh kadi sane sampun-sampun.
 - b. Ring Pura-Pura Desa sekadi Pura Dalem pateh sekadi ring sane sampun memargi manut dresta, sami olahan caru punika ke bagiang oleh soang-soang banjar.
 - c. Ring paumahan / pekarangan nasi manca warna 9 (siya) tanding, daging ayam brumbung sane sampun kaolah, tetabuh (tuak arak), segeh agung atanding lelauknya jejeroan matah (daging basang bawi sane matah).
2. Nyoreang kawentenang pangerupukan mabuwu-buwu, pangerupukan kapidabdab antu I Prajuru mangda tan jantos ngawinang kerusakan, utawi baya geni, tur tan jantos langkukangan ring tengah wengi.
3. Ring rahina panyepian patut kemargiang Berata Penyepian / Catur Berata manut agama luire :
 - a. Amati geni
 - b. Amati karya
 - c. Amati lelangunan
 - d. Amati lelungan.
4. Pemargin beratane manut kawentenan desa kala patra, saha ketuntun olih I Prajuru desa utwi sang sane kasudi, pengawit brata penyepian kemargiang patut macihna suaran kulkul manut pararem.
5. Sang sane mamurug brata penyepian punika wenang keni pamidanda manut pararem, sajeroning sane polih kalugrahan manut wigunannya, kapialang, madruwe anak alit miwah sane siosan antuk I Prajuru.
6. Pemargin sang mamurug kalaksanayang olih prajuru (tanda) wiadin pacalang lan kelik tanem.
7. Rikalaning ngembak geni, mapiteges panglukatan brata semadi soang-soang wong krama patut masima krama, nunas pangampura tur pengaksama ring sesamin wargi, tur ngawit dewas lçaka warsa.
8. Yan warga adat desane ngelaksanayang pamuspayan kengin mabusana adat sapatutnya (kampuh lan umpal). Sampunika taler sane istri kapatut nganggon busana manut tata susilaning adat lan agama. Sapretingkahe mangda sergep jangkep makta upakaraning muspa, sekar, kwangen, lan dupa.
9. Pelaksanaannya magda memargi becik, trepti tan kahanan haruhara. Indik ring ajeng keanter olih pemangku lan Prajuru.

SARGA V

INDIK PAWIWAHAN

PAWOS 54

1. Pawiwahan panunggalan purasa lan predana lanang istri malarapan panunggalan suka cita kadulurin antuk upasaksi sekala lan niskala.
2. Pamargin ngerorod/nganten sane rahayu maduluran pengedih (Pepadikan). Yaning sangkaning / sami-sami demen, maduluran manah sane becik (nenten kapaksa)
3. Pemargin ngerorod sane rahayu sakewanten tan maduluran pangedih utawi tan pepadikan.
4. Pemargin ngerorod sane tan rahayu inggih punika, melegandang, memaksa, miwah sakancan sane ngawinang ila-ila pisa tan patut kelaksanayang, kapungkuripun mapuara tan becik ring sajeroning nyusun paumahan sane rahajeng.
5. Pamargi ngerorod sane rahayu manut dresta muang sima/cara belajar lan Desa Batununggul sekadi ring sor puniki :
 - a. Pelakuan / mesedek
 - b. Wenten pangeraes / pengeraos.
 - c. Wenten pasuwakan.
 - d. Wenten matantu (nganutin kawentenannya) tur masakapan mapamit ring pemerajan / Parhyangan utawi ring Sanggah Kemulan sang istri.
6. Aci-aci widi widana
 - a. Widi widana saha kasaksinin antuk Klian Banjar, Bandesa Adat, Kepala Dusun, Kepala Desa, Sang Muput (Sang Sulinggih miwah Pemangku)
7. Pidabdab sang pacang mawiwaha :
 - a. Sang lanang mayusa 19 (siangolas) masa lan sane istri mayusa 16 (enembelas) masa.
 - b. Sangkaning pada rasa / tan kaparikosa.
 - c. Yan ngambil sios agama kaptut kamenggalain antuk banten penyambutan.
 - d. Nganutin kacaping agama
 - e. Mangda nganutin daging Undang- Undang Perkawinan sane kelajarang antuk guru wisesa (UU. No. 1/1974).

PAWOS 55

Tata cara perabian ring Desa Adat Dalem Setra Batununggul kadi ring sor :

1. Sang pacang merabian utawi ngawarangang kluargannyane, catut masadok ring Prajuru indik pemargin pewartanne.
2. Pemargi pepadikan madudonan sekadi ring sor :
 - a. Perilaksanane ping tiga luire : pesewakan, pengambilan, lan pgunyaan.
 - b. Yan sampun pada tulus tur sami anut, wargan sang wadon rais masadok ring prajuru utawi Kelihan Banjar.
 - c. Pungunyaan maduluruan pejati ka sanggah/pemerajan wadone.
3. Prade ngerangkat/ngerorod, inggih punika sang pacang kerakatang patut lumaksana sekadi ring sor :
 - a. Ngawentenang pemelaku / pesedek sanistane 2 (kalih) diri.

- b. Ngawentenang pengerawos sesampune masengker 3 (tiga) rahina, duluran pengeraose inggih punika : sedah, jambe, gambir, seseban/lanjaran apah lan tubungan tur madaging sekar, matatakan dulang senistane 2 (kalih) diri.
- c. Ngawentenang pasuakan, saha larapannya sekadi ketipat bantal lan sanganan kelaudan miwah sekancan ipun kesarengin olih kluarga lanang istri.
- d. Daging pasuakane nunas pengampura geng rena manut ring sang wadone.
- e. Kaigumang antuk baos indik pasuakane tulus tan tuluse ring daging pasuakane.
4. Riwus pengambilan warga sang istri masadok ring I Prajuru banjar. Prajuru raris nyuarang tengeran kulkul, maka cihna pemargi ngerangkate sampun katerima, laju natab pabyakala. Sampunika taler warga sane lanang nunas suaran kulkul ring I Prajuru, cihna pemargin ngerangkate sampun keterima.
5. Upami pelaku/pesedoke keterima ring warga sang istri raris nenten kaicen suaran kulkul majalaran saking tan setuju ring sane lanang, pidabdab pemargine sangkaning sami rena utawi tan kaparikosa. Indik punika sang lanang patut nyadokang ring Prajuru (nganut dudonan).
6. Kramane sane nampi wong ngerorod, patut masadok ring I Prajuru Banjar.
7. Prajuru patut digelis maritetes sang ngerorod maka buatan maritiaksayang manut utawi singsal pemargine ring drestane.
8. Bilih pemargine manut ring drestane, sang ngerorod miwah sane nampi polih mapikuluh pesayuban banjar minakadi I Prajuru.
9. Prade pemargine tan manut ring drestane, I Prajuru patut digelis malasang tan ngawehin pasayuban ring sang katetahan punika, punapi malih linggih sang kateteh dura dosa, usahane katur ring sang rumaos utawi ring guru wisesa.

PAWOS 56

1. Sang meseserep yogya digelis mesadok tur nunas penuntun ring prajuru.
2. Sang maseserep patut tinut ring sapituduh I Prajuru nganinin tata netes pangerorode luire :
 - a. Ngeranjing ring umah inucap tan langkungan ring kalih diri.
 - b. Tan kengin makta gegawan muang sakeluirnya.
 - c. Tan engin matingkah lan mabaos tan patut.
3. I Prajuru patu midabdabin tata cara panetese trepti, maka babuat ipun mangda anake istri jati-jati polih nerangang idep nyane sebeb-bebasnya.
Pidabdab luire :
 - a. Anak istri nunas ring inange magenah pradana kirang ring tigang depa tan kalugra anak sios ngenampekin tatujon mandene anake istri punika tan kemad ngaturang indike ring sang maritetes.
 - b. I Prajuru nyumakutayang pamekas ring sang istri, mungguhing pacang ngicen pesayuban manut ring keterangan sang isri. Yang pada arsa pangerorode sang maseserep pacang matulak. Yang sangkaning kepaksa, sang lanang pacang katiwakin pamidanda manut kecaping perarem daging pamutus desa adate.
4. Paseserepe patut polih wak-wakan antuk prajuru ring genah maseserep.

PAWOS 57

PAWIWAHAN KADADAK

1. Yan ana anak istri kari deha durung alaki rabi, pikanten mobot / beling tur kapitetes pengangkene sekadi ring sor puniki :
 - a. Yan sane lanang ngangken madruwe pakardine tur kari teruna patut sang lanang kaantenang arep anake istri sane mobot punika.
 - b. Prade sane lanang tan suka nganten arep ring anake istri sane mobot punika, ane lanang patut kapidanda gung arta manut pararem, muang pemargi selantur ipun katur ring sang rumawos. Risampune embas / lekad rarene patut kapreteka sepula pali manut manusa yadnya ring sang istri.
 - c. Yaning anak lanang sampun alaki rabi ngangken madruwe bobotane tur anake lanang sanggup pacang ngambil sang mobot, pinih riin sang lanang matur piuning ring sang rumawos utawi ring Pengadilan Negeri.
 - d. Prade tan kalugra antuk sang rumawos, punapi malih majalaran tan polih wak-wakan saking rabine kapertama. Risampune embas/lekad rarene wenang sang mepekardi sekadi ane lanang ngupakar / mahayu rarene sekadi patut.
 - e. Prade anake istri sane mobot nunggl punika paling pengangkene, sakewanten mitujuhang anak lanang sane kesenengin, sang kapitjuang nenten ngangkenin, indik punika patut kawentenang padewa saksi. Risampune embas rarene patut kepahayu sepul pali antuk sane istri manut cara lan sema manusa yadnya.
 - f. Prada sang mobot nuwa paksa pengakene, sang mobot keni pamidanda tur marisuda desa manut daging pararem. Indike punika kabaos nuka anyu pati grape.

PAWOS 58

Indik anak istri ngambil ngeraris ngerorod :

1. Sehanan warga desa sane sampun alaki rabi, sangkaning wenten riyet rin perabian sang istri raris ngambil budan ka umahne wiadin ke umah anak sios jantos nem sasih suwene tan mewali ka umah kurenanne, wetu raris ngerorod ring anak sios indike wenten sulur nyane mekadi ring sor puniki :
 - a. Yan sang lanang tan naenin ngererh sang istri, tur tan naenin nguwehin pangupa jiwa, prada sang istri mapekayun jagi ngerorod, kapatutang mangdene wenten surat bukti utawi akte saking sang ngawenang indike palas merabian. Yaning mobos pelaksanane ngerorod lanang wiadin sane istri keni pamidanda manut perarem.
 - b. Sakewanten yaning sane lanang ngawit saking istrine ngambil naenin ngerereh, tur sampun taler nguwehin pangupa jiwa, ngeraris istrine ngerorod wenang sang ngambil keni pamidanda seantukan punika kabaos arabini wonga rabi. Selantur ipun sang sane keni pakobet kengin nunas pematut ring sang rumaos utawi guru wisesa.

PAWOS 59

1. Pamargin ngerorod/ngerangkat sane kabaos partika puput luire :
 - a. Ngawit ngerorod / ngerangkat, masuara kulkul ring bebjajaran genah anake lanang lan anake istri maka pesiar ring ikrama banjar utawi desa.
 - b. Risampune pengerorodan punika manut tata cara agama patu mabiakala miwah maperascita, saha ngerereh surat ilikita (akte) perkawinan.

- c. Yan sampun nganutin tata cara agama kadi ring ajeng wawu pawiwahan punika sinaggeh pastika puput (syah).

PAWOS 60

Sang wus merabian, palas tan sida alaki rabi

1. Manut pemargin sang lanang yogya merabi adiri sejawaning wenten penubayan / kebebasan antuk rabine ping rihin, manut sekadi undang-undang guru wisesa (UUNo.1 / 1974)
2. Sang wus merabian palas tan sida satinit alaki rabi, kabaos nyapian, yan wus merabian sangkaning kepadaman kabaos balu.
3. Sang ayat pacang nyapian taler mangde nganutin sane wenten ring undang-undang / awig-awig sepatutnya atur supeksa ring sane rumaos nunas peilikita, wastu tinas apadang indik pemargin nyapihan.

Selantur ipun I Prajuru nyiarang ring banjar utawi ring desa saha patut pemargine masamsam ring pura.

PAWOS 61

1. Sultur pacang palas merabian wenten sangkaning :
 - a. Pada lila pacang nyapihan
 - b. Sangkaning wicara majalaran ngege baos anak siosan miwah pisuma ngawinang tan presida adung maprabian.
2. Yan prade palas saking tusta lila sang nyapihang kepatutang sekadi ring sor :
 - a. Naur prebea ring paruman.
 - b. Polih pah-pahan paguna kayan.
 - c. Pebekelan mewali niri-niri.
 - d. Wewarisan kekuasaan antuk kepurusan.
3. Jalaran nyapihan tan pada lila wit saking wicara luire :
 - a. Anyasar laku, para dara, drati krama.
 - b. Kapunggelang rasa, utawi wandu.
 - c. Wak parusya, wiruseng laku.
 - d. Macecala matilar tan pesadok, utawi tan paweh pangupa jiwa langkung ring enam sasih.
4. Prade kachina tur kesadokang antuk sinalih tungguil manut sekadi jalarannya perabian inucap wenang kepalasang, sang sisip keni pamidanda manut perarem.
5. Sang nyapihan keni pamidanda ring desa , risampun katiwakin pamutus antuk sang rumawos, manut jalarnnya nyapihan sekadi inucap ring ajeng.
6. Yan riwekas sang pecak nyapihan malih adung mapikurenan, patut ngelaksanayang pawiwahan manut pawos perabian ring ajeng.
7. Wong inucap keni pamidanda manut perarem saha patut kedulurin banten pamerascita.

PAWOS 62

1. Balu luh sane katinggal lampus antuk suaminya utawi balu sane pecak nyeburin patu ngemargiang swadarma kadi ring sor :
 - a. Ngemanggehang patibrata, tan para dara, drati krama
 - b. Ngemargiang sehanan ayah krama.

- c. Ngeraksa, ngutsahang lan miara sehanan warisan lan pagunakayan kalih sentanannya.
 - d. Tan kengin ngadol utawi ngediang warisan sejawaning polih kebebasan saking kula warga rabine saking kapurusa.
 - e. Kawenang malih mawiwaha yan sampun kapaigum antuk oka deha truna lan kula warga kapurusa.
2. Balu sane tan pageh ring swadarma luire :
 - a. Matingkah drati krama, para dara lan selantur ipun.
 - b. Matilar tan pesadok jantos langkungan ring 6 (enam) sasih.
 - c. Lempas ring swadarmaning balu.
 3. Balu sane tan pageh ring swadarma kadi ucap ring ajeng prada macihna manut ring Tri Pramana (bukti ilekita-saksi) salah prewertine wenang katundung olih wargannya, saha tan polih pah-pahan warisan.
 4. Prade wenten balu tan pasentana pageh ring swadarma katundung olih wargannya patut polih pah-pahan paguna kaya.

PALET 1 : INDIK SENTANA

PAWOS 63

1. Indik sentana ring Desa Adat Dalem Setra Batununggul sane laksanayang manggeh sekadi ring sor puniki :
2. Sentana wenten kalih pawos sane kaucap prati sentana lan sentana peperasan.
3. Sentana sane metu saking pawiwahan, sane sampun merupa syah pupating saksi sekala lan niskala kabaos preti sentana.
4. Yan sentana sane metu saking pawiwahan sane durung syah utawi pawiwahan durung kapatut, daha sampun mobot, sentana inucap patut kaupakara manu agama kaprati sentana tur kesaksiang mangda tan kaucap leteh.
5. Prade saking pawiwahan tan prasida ngawentenang sentana utawi ngidih sentana kaduluran antuk upasaksi sekala lan niskala saha upakara peperasan kawastanin sentanan peperasan.
6. Yan wenten krama mederbe pianak lanang asiki, tan dados pakidih.
7. Ngidih sentana manut kasujatian manah/kayun sang mekarsa majalaran manah lulut asih, adung segilik seguluk kapungkur ipun jagi natak pane tis ritatkala sampun werda.

PAWOS 64

1. Ngadegang sentana patut macihna antuk arta brana paperasan saha kesksiang antuk Prajuru, warga lan waris tur kemanggehang ring ilikita antuk prajuru tur kaupasaksi kapuputang yadnyanre (pemersnya), antuk Ida Sang Sulinggih.
2. Sang pacang ngadegang sntana patut masadok ring prajuru asasih sadurung pamerasnya, tur patut kawentenang pesadu marep ring kulawarga warisnya.
3. Bandesa adat utawi perwakilan olih Klian Banjar patut nyarwakang rign krama wewidangannya indik rencana sang pacang meras sentana.
4. Yan ana tan ninutin / utawi keberatan mandenya nyadokang bawos pengadeng ring I Prajuru masengker tigang uku sehanan panemaya pemers punika.
5. Bandesa adat digelis maosin, saha ngicen panuntun utawi penepas manut catur dresta, muah manut daging perarem banjar.
6. Prada pemargin pacang meras tan kapialang wawu kapuput pacang kelaksanayang.

7. Prade wenten ngalalangin, manut sulur kecaping ajeng, Prajuru wenang ngandeng sang pacang meras, saha wenang maweh panuntun mande wenten wirasa ring sesamanya.

PAWOS 65

1. Pamerasan sane patut kamargiang sekadi ring sor :
 - a. Indik pemerasan / pengangkatan sentana kapertama waris kapurusa, lantur yang tan wenten sekadi ring ajeng, kengin saking wadon, dadia, anak siosan, nanging magde tan wenten sane kababatan.
 - b. Upakara / upacara pemerasan (pengangkatan waris) sentana puniki patut kesaksinin antuk pandita, pemangku lan prajuru ada desa/banjar miwah Kepala Dusun, Kepala Desa.
 - c. Sesesampun pemerasan lan upacarane punika kelaksanayang olih sang memeras raris kasiarang ring krama desa

PAWOS 66

1. Sahanan krama sami sane ngeroban ngajak sakula warga sekadi ring sor :
 - a. Masundulang raga.
 - b. Nyama mulih saking pakurenan
2. Pasadok ring I Prajuru kaduluring antuk keterangan ilikita pastika manut ring Tri Pramana (Bukti – Ilikita – Saksi), nganinin linggih, tetengenan lan arta brana, jagi ngayahang indik pakraman.
3. Punapi malih yan wenten leluhur sane lampus wenten pabuat bebesene ring rabi lan okanne kapungkur yan sampun wenang sengkere jagi sedi kapiduhan mangde masundulang raga ring sinalih tunggil waris kapurusannya (wenten pabesen wasiat)
4. Ngajak wong duduk-dudukan lan waang pastika jenek, miwah sane siosan, patut atur uning ring prajuru adat desa/banjar soang-soang.
5. Kramane sane ngereebang / ngajak, patut tanggung suma kuta negenang lampah sang karobang arepe ring kasukertan banjar lan desa adate.
6. Prajuru banjar lan desa adat ngunggahang pasadok punika ring ilikitannya saha nyiarang ringparuman banjar lan desa adate.

PAWOS 67

1. Swadarmaning sane meras sentana, pateng ring swadarman guru, luire :
 - a. Maweh pangupa jiwa
 - b. Ngupakara manut agama
 - c. Maweh ngutsahayan kaweruhan sentana / nyekolahang
 - d. Ngupadi kerahajengan anut patitis ngrehasta lan selantur ipun.
2. Sang kaadegang sentana swadarmanya pateng ring swadarmaning sentana, setata ngupadi darmaning putra sentana.
3. Yan sang kalih inucap ring ajeng sinalih tunggil lepas ring sesana yogya kesadokang tur keni pamidanda manut pararem.
4. Pemargi krama banjar : krama banjar/desa sane kewastanin nyada (tan keni patus) ritatkala sampun madruwe oka lanang merabian sane sinaggeh silur dii.

PALET 2 : INDIK WEWARISAN

PAWOS 68

1. Sehanan tetamian arta brana , pusaka saha ayah-ayahan kasukertan sekala lan niskala saking keluhurannya ring katurunannya kabawos warisan.
2. Kang sinanggeh warisan luire :
 - a. Druwe tanah, turun tumurun saking kaluhurannya, arta brana, sanggah / merajan, tanah, ayah-ayahan, pusaka lan sekeluiripun.
 - b. Paguna kaya.
 - c. Utang – piutang.
3. Sane kabawos waris pewarisan inggih punika :
 - a. Sane kapiturun kebawos waris.
 - b. Katurunannya kabawos ahli waris.
 - c. Arta brana miwah tategehan lan ayah-ayaham kabaos warisan.

PAWOS 69

1. Sane kengin manggeh ahli waris :
 - a. Kaping ajeng prati sentana purusa utawi sentan rajeg lan sentana paperasan.
 - b. Prade tan wenten sekadi turunan purusa patut karereh pepernahan sekadi rerami misan mindon.
 - c. Turunan kesamping mekadi misan mindon.
2. Ngemargiang ahli waris mekadi ring sor :
 - a. Ngemargiang /seledini ayah-ayah waris.
 - b. Ngutsahang utawi polih pah-pahan arta brana wewarisan.
 - c. Ngarespon kahyangan / merajan lan pura tatinggalan warisan saha ngupakara.
 - d. Ngelaksanayang sehanan pitra yadnya leluhur.
 - e. Naur / nanggening hutang – piutang pewaris antuk katinggalan pawaris utawi antuk guna kaya.

PAWOS 70

1. Pawaris kengin kepah-pah sareng sesamania sang patut ngewaris risampun swadarmaning ahli punika kaputang makadi :
 - a. Muputan pitra yadnya pewaris leluhur.
 - b. Naurin utang-piutang
 - c. Nyeledihin sehanan ayah-ayahan.
2. Pah-pahan warisan patut mangde arep ring sinalih tunggil waris manut tingkatannya len dudonnya.
3. Yang tatinggalan guna kaya pah-pahannya taler kengin nganutin pasubaya pewaris sedawegnya maurip utawi nganutin surat wasiat.
4. Sentana rajeg/wadon polih pah-pahan atenga saking pahan sentana purusa.
5. Sane tan patut polih pah-pahan :
 - a. Alpaka guru rupaka
 - b. Nilar agama lan sahan kawitan
 - c. Sentana rajeg kesah wewarisan, keperas keadegang sentana antuk anak sios lan sang nyeburin, ika ngaran ninggal kedaton.

- d. Sang lumaksana kadi kacaping ajeng patut ngawaliang pah-pahan warisan sane pecak katerima.
- e. Sane kepatut tan polih pah-pahan sakewanten polih muponin pah-pahan sekadi ring sor :
 - 1) Sang mulih deha, mulih riantukan duk pawiwahannya kaucap ninggal kedaton
 - 2) Balu luh sane pecak kawiwahang antuk sentana paperasan.
 - 3) Balu muani nyeburin
 - 4) Sentana luh sane pade loka sanggraha tan kesah mawiwaha, mewastu pamianak sentania kengin ngewaris paguna kayan bidangnyane.
6. Pewariskengin tur kapatut mepeweh duk kari maurip sane kesah mawiwaha.
 - a. Paweweh jiwa dana, utawi pabekel tatadan ring ipianak sane kesah mawiwahan.
 - b. Paweweh padgatakala.
 - c. Paweweh pedum pemegan/reraksan padgatakala arep ring ahli waris, sakewanten mejalaran manah adung paras paros ring sasemetone siosan.

PAWOS 71

1. Prade yan sajeroning pakulewargan ahli waris lintangan ring adiri, sesaman ahli waris puniki patut ngawentenang pah-pahan. Tingkahe pacang ngedum waris patut sekadi ring sor :
 - a. Pertama ring ahli waris purusa
 - b. Waris pepernahan ngungghang.
 - c. Waris pepernahan kesamping.
 - d. Prade tan wenten kadi ring ajeng, kengin katiwakang ring turunan wadon.
 - e. Prade tan ana, raris wong sekama-kama (tunggil paibon).
2. Prade yan wenten jantos ngepah tegal/pabianan, barang ayah-ayahan banjar, soang-soang ahli raris inucap patut katedunang ngewarginin ayahan krama banjar ngarep.

SARGA VI

WICARA LAN PAMIDANDA

PALET 1 : INDIK WICARA

PAWOS 72

1. Sane wenang mawosin utawi mutusang wicara ring Desa Adat Dalem Setra Batununggul, inggih punika sang kasinanggeh kerta desa putusing Prajuru-Prajuru banjar lan desa. Putusan panepas nganutin awig-awig sane mawasana nereptiang jagat, desa, lan banjar.
2. Putusan panepas nganutin awig-awig desa patitis lan pamikukuh banjar.
3. Prade wicara tan prasida molihang desa sang mawicara kengin nunas ring sang rumawos utawi ring guru wisesa.

PAWOS 73

1. Sehana wicara sane mawiwit saking laksana corah, baya, nungkas awig-awig sane mawasana kajagadi tan jagat utawi banjar patut digelis kebaosin antuk Prajuru-Prajuru banjar.
2. Sejaba wicara sekadi ring ajeng patut ngantosang pesadok saking sang nunas bawos.
3. Panepas patut pastika :
 - a. Pastika nyatenang iwang patut.

- b. Yan marem pepek/nganinin ring indik catur dresta (sastra dresta, purwa dresta, loka dresta lan desa dresta)

PALET 2 : INDIK PAMIDANDA

PAWOS 74

1. Desa utawi banjar wenang niwakang pamidanda ring warga sane sisip.
2. Patetiwak / metetiwak pamidanda kelaksanayang olih bandesa adat utawi prajuru banjar.
3. Bacakan pamidanda luire :
 - a. Ayah-ayahan panukun kasisipan.
 - b. Danda arta (dadosan saha panikelnya utawi panikel paturunan)
 - c. Pangupakara / pengaskara
 - d. Rerampagan
 - e. Kedaut tanah ayahan banjar.
 - f. Lan pamidanda tiosan.
4. Geng alit pamidanda sane katiwakang sor singgih utawi sisipnya manut putusan pararem.
5. Sehan jinah utawi raja brana saking pamidanda, kasinanggeh druwen banjar / desa.

PAWOS 75

1. Yan wenten prade krama sane langkung ring tigang paruman memandal tan naur paturunan utawi dadosan wenang karampag.
2. Tata cara ngelaksanayang rerampagan manut kadi ring sor :
 - a. Kadulurin antuk pesadok prajuru marep ring sang pacang kerampag
 - b. Pemargi ngerampang kelaksanayang olih I Prajuru kesarengin olih seakehnya 5 (limang) diri pinaka saksi lan ngarambo I Prajuru.
 - c. Sang ngerampag mangde sangkaning darsana ngambil rerampagan utawi nyawenin tanem tuwuh seakehnya nganut ring utang sang kerampag.
 - d. Rerampagan kemanggehang ring ilikita tur kesaksiang
 - e. Prajuru matetesan sang kerampag mangde digelis nebus sadurung waneng 9 (siya) rahina.
 - f. Lelangan punika keanggen nuku utangnya ring banjar utawi ring desa tur kawewehin antuk pengangan rerampagan, sisannya kewaliang ring sang kerampag.
3. Pamidanda sisip kadi ring ajeng prasida purna buntas tinas apadang yang sang sisip sampun :
 - a. Nunas gen rena sinampura ring krama banjar, riantukan purun nguak pasubayan (pasuara ring pararem).
 - b. Naur pamidanda penguak suara, naur pamidanda geng arta duk pacang kerampag. Rerampagan kadi ucaping ajeng tur wong inucap mawali katerima sekadi krama banjar.

SARGA VIII

NGUAK KALIH NGUWUHIN AWIG-AWIG

PAWOS 76

1. Nguak nguwhin awig-awig punika kelaksanayang antuk paruman Desa Adat Dalem Setra Batununggul.
2. Paruman inucap patu kdasar in antuk gilik saguluk paigum perarem krama banjar

3. Paputusan bebaosan prasida yan sampun kramane gilik saguluk utawi kengin majalaran pasuara (wawilangan suara).
4. Yan madasar wawilangan suara gaguatnya kadi ring sor :
 - a. Krama desa sane parum kalih pah tigaan (2/3) saking kweh desa adate.
 - b. Pawilangan suara sane manut sanisatane apahan (1/2) langkung adiri saking wewilangan suara krama desa adate.

PAWOS 77

1. Rencana paruman indik nguak nguwhin awig-awig kadi ring ajeng, kengin kamedalan antuk Bandesa Adat, Klian Banjar patus utawi saking krama niri-niri

SARGA VIII

P A M U P U T

PAWOS 78

1. Awig-awig puniki kawastanin : AWIG-AWIG DESA ADAT DALEM SETRA BATUNUNGGUL.
2. Awig-awig Desa Adat Dalem Setra Batununggul puniki manggeh kelaksanayang ring sajeroning wewidangan Desa Adat Dalem Setra Batununggul sekadi kecap ring ajeng (Pawos 1.4)
3. Awig-awig puniki kamargiang ngawit saking keraremin antuk Desa Adat Dalem Setra Batununggul.
4. Awig-awig Desa Adat Dalem Setra Batununggul puniki nganinin sehanan warga lan krama desa miwah sakeluirin sane kakuwub antuk Desa Adat Dalem Setra Batununggul.


PAWOS 79

1. Sakeluirin pemargin sane wenten sadurungnya patut keanutang ring sedaging awig-awig puniki.
2. Sakeluire pemargi pekrarem sane durung kebawos utawi durung munggah sajeroning Awig-awig puniki manggeh kelaksanayang manut tata cara sampun ketah memargi kadulurin antuk pararem / paruman desa.

PAWOS 80

Awig-awig puniki kararemin duk rahina : Buda Umanis Uku Kulantir Sasih Kapat, pangelan kaping tiga welas, iḡaka warḡa 1909.

Kesarengin oleh :
1. Kepala Desa Batununggul.



2. Kepala Desa Batununggul.

(I Dewa Gde Konta)

3. Kelian Banjar Montigi,

(I Nyoman Kasmin)

4. Kelian Banjar Sampalan,

(I Dewa Gde Kerta)

5. Kelian Banjar Geria Tengah,

(I Dewa Gde Haba)

6. Kelian Banjar Batununggul,

(I Dewa Gde Taiba)

7. Kelian Banjar Tainbesi,

(I Dewa Paing Sotawan)

Bendesa Adat
Desa Adat Dalem Setra
Batununggul

(I Dewa Gde Winastra)

1. Penyerikan

(I Dewa Gde Merta)

2. Petongen,

(I Dewa Made Sudarta)

KAKUKUNANG :

Duk Rahina : Budha Kliwon Ulu Cumbreg
tanggal Kaping tigawelas, Isaka Warqa : 1909.
Tanggal 4 November 1987

Olin

Bupati Kepala Daerah Tk.II Klungkung,

(dr. Tiokorda Gde Agung)

LEMBAGA DESA ADAT DALEM SETRA BATUNUNGGUL

DAFTAR : SUSUNAN PANITIA / PENULISAN AWIG-AWIG
DESA ADAT DALEM SETRA BATUNUNGGUL

PELINDUNG	: I WAYAN NURADA (KEPALA DESA BATUNUNGGUL)
PENASEHAT	: 1. I DEWA GEDE ANOM 2. I DEWA MADE PEJENG 3. I DEWA GEDE PUGLEG 4. I DEWA KETUT MANTRA 5. I DEWA GEDE URYA 6. I DEWA KETUT ARTHA 7. I DEWA GEDE OKA
KETUA UMUM	: I DEWA GEDE RAI
KETUA I	: I DEWA GEDE NABA
KETUA II	: I DEWA MADE SUDANA
KETUA III	: I DEWA GEDE WINASTRA
SEKRETARIS I	: I DEWA MADE MANDIA
SEKRETARIS II	: I DEWA MADE SUDIARTHA
BENDAHARA	: I DEWA MADE RAI SUDARTHA
ANGGOTA	: 1. I DEWA KETUT RAKA 2. I DEWA MADE SUSANA 3. I DEWA MADE MERTHA 4. I DEWA GEDE TASTRA 5. I MADE MISNA 6. I DEWA GEDE TEGEH 7. I DEWA MADE SULEWA